



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

5. Kalenderwoche – ab 1. Februar 2009

Gemeinsam is mor schdarg

Also, nee - manschma weeiß isch eenfach nisch, was isch mir im Fernsähör anguggn soll. Da hasde nu drei Dutzend Sendor... eene Auswahl, wie offm Trödlmargd... das meisde is wie von dor Milldebohnie... un andauernd wern de Filme wiederhohld. Grade ooch meine Lieblingsfilme - also, de Dadorde un de Bollezeirufe. Obsch een schon gesähn hab, so een Dadord odor Bollezeiruf, das märg isch friehsdens so nach eenor halm Schdunde. Manschma ooch erschd am Ende, abor immor dud erschdema eene ganze Weile vorgehn, eh isch mir werglisch sichor bin, ob isch dähn Grimmi nu schon kenn due odor nisch. Alleene an de Gommisahre dusde das ja nisch märgn. Das sinn ja immor welsche, die öfdors dran sin mid dor Ermiddlung. Also, wenn dor Manne Kruch odor de Furdwänglorn offdauchn dud, das weeißde noch lange nisch, ob de dähn Dadord schon gesähn hasd. Odor ooch bei Scheggy Schwarz im Bollezeiruf... die komm ja immor widdor ma dran. Nee, du mussd das an annre Sachn rausgrischn. An de Obfor zum Beischbiel.

Jednfalls, wenn isch dann mäрге, dass isch dähn Grimmi schon gesähn hab, dann such isch mor was annersch. Da zabb isch ma so dursch. Un da bassierds dann ehm, dass isch so unvorhoffd off Filme schdoßn du, wo isch das blange Grusln krisch. So Horror un Seinsfigschn... un Drillor... nee, da duds Filme gähm, da komm so ganz häßliche Wähsn drinne vor... so Zombis... die aussähn dun, als wie wennse schon baar Jahre im Grab gelähschn hamm un nu bledzlish rausgekomm sinn. Odor ooch annre ganz furschdbahre Geschdaldn aus annre Weldn... odor Undohde... un dann duds so Siduadsjohnen gähm in die Filme, da muss isch schnell de Oochn zumachn, damid isch das nisch sähn du. Sonsd dräum isch dadervon un schlafe schleschd. Nee, werglisch - fiehr de meisdn Filme, die so ahmds loofn dun, bin isch nisch geeischned. Da bin isch eene Ard Weischei!

Un isch kann mir gahr nisch vorschdeln, währ sich die grauslischn Filme zumuhdn dud? Die missn doch Hornhaud off dor Seele hamm! Guhd, am Anfang, wenn so e Film Isogehn dud, da dun die ja immor sachn, dass dähr Film fiehr Zuschauor unnor sechzn Jahre odor unnor achdzn Jahr nisch geeischned is. Das sinn dann die Filme, die nisch ganz so grauslich sinn. Das sinn die, die de dir als äldoror Mänsch villeischd noch zumudn kannsd. Die Filme, die fiehr de Juchend geeischned sinn, die kannsde dir dann bloß noch in dor Grubbe anguggn, wenn de jemand hasd, dähr dirs Händschn haldn dud. Ginsdisch wärs desvorweschn ehm villeischd, wenn die am Anfang sachn dädn, ab welschm Aldor so e Film geeischned is. Ab Fuffzisch zum Beischbiel odor ab seschzisch! Horror dud im Aldor zu sähr offs Gemiehd gehn. Desweschn war das ja ooch, wo die sechzn Rendnor ins Kino wolldn. In een Horrorfilm. De Eindriddskardn haddn se gekoofd. Dähr Film hadde schon lange angefang, abor die sechzn aldn Leidschn hamm immor noch draußn geschdandn. Dor Kardnvorkeefor wundord sich nu un frachd, wieso die nisch neingehn? Sachd eenor von die sechzn Rendnor: Mir wardn noch off zwee zur Vorschdärgung, dähr Film is erschd ab achdzn!

Eduard Sachsenmeyer